



Ili ćemo postati Japanci ili nas neće biti....

Ne znam, dragi moji, šta reći pametno nakon ove tragedije koja je zadesila našu, ali i države u regionu, pogotovo što je toliko gluposti (iz)rečeno i napisano, da se davanje mišljenja čini kao hod po minama... Ne bih lamentirala nad ponašanjem vlasti u datim okolnostima – nekako želim misliti da niko normalan, a valjda toliko jesu normalni, nije rád ovakvoj katastrofi – pa su radili ono što su mogli i znali u datim okolnostima i datom vremenu. Šta su mogli uraditi prije poplava, u ovih proteklih 20 godina i to ne samo u BiH, nego i u susjednim zemljama – brojni stručnjaci koje ovih dana čujemo rezignirano tvrde da NIŠTA nije učinjeno na vodozaštiti od proglašenja samostalnosti ove, one i inih zemalja u regionu – o tome će se imati kada govoriti; ono što me zanima jeste šta sad? Koliko brzo smo u stanju vratiti ono što smo izgubili u poplavama? Imamo li neki plan? Šta će država uspjati uraditi za onaj poslovni dio zajednice koji je također pretrpio ili će tek pretrpjeti gubitke, kako bi se iz njihovog rada mogla barem nekim dijelom finansirati obnova?

No, nisam optimista. A mislim da je teško i biti kad dobijete saopćenje sa vlade koja kaže "da će za magistralni put M 17 koji je u mjestu Kosova prekinut za saobraćaj, trebati dosta vremena da bude obnovljen"...Vremena? Koliko? Za put koji je žila kucavica BiH? Razumiju li uopće važnost ove komunikacije za ljude, ali i ovo nešto privrede što svakodnevno glavinja između tržišta, poreza i obaveza koje su, ptice na grani već znaju, prevelike i preteške za velike kompanije, ali i za mala i srednja preduzeća... Imaju li plan? Bit će mi drago prevariti se, ali bojim se da ne. I jako bih voljela da mi objasne šta im sad fali? Znanja? Sumnjam....Novaca? To tek sumnjam....Prije će biti sposobnosti da shvate šta je bitno i koliko je nešto bitno, odnosno, bitnije od nečeg drugog također bitnog....

Sjećate se kad je ono zemljotres u saradnji sa cunamijem rasturio Japan? Sigurno se onda sjećate i kada je vijest dana svih vijesti diljem svijeta bila o tome kako je autoput koji je doživio historijsko rasturanje, za saobraćaj u potpunosti osposobljen za šest (6) dana!!! **B**

*Aida Delić,
glavna i odgovorna urednica*